

Reykjavík, 9. nóvember 2022

Borgarráð
Ráðhúsi Reykjavíkur
Tjarnargötu 11
101 Reykjavík

Efni: Tillaga borgarstjóra, dags. 10. október 2022, sem lögð var fram í borgarráði hinn 27. október síðastliðinn

Hinn 27. janúar 2022 samþykkti borgarráð tillögu borgarstjóra um skipun starfshóps á vegum Reykjavíkurborgar sem fá átti það hlutverk að móta drög að stefnu og tillögum um aðkomu Reykjavíkurborgar þegar kemur að sjálfstætt starfandi leikskólum og grunnskólum þar sem horft verði til þjónustusamninga, framlaga, húsnæðismála, stofnstyrkja, leigusamninga sem og annarra þátta sem máli kunna að skipta í þessu samhengi. Í niðurlagi greinargerðar tillögunnar sagði:

Því er lagt til að skipaður verði starfshópur með formlegu erindisbréfi með sérfræðingum Reykjavíkurborgar til að móta drög að stefnu og tillögum um aðkomu Reykjavíkurborgar, með aðkomu fulltrúa sjálfstætt starfandi leikskóla og grunnskóla, þar sem jafnræði og gegnsæi er haft að leiðarljósi þegar kemur að aðkomu og framlögum Reykjavíkurborgar.

(Undirstrikun SSSK)

Á fundi 5681. borgarráðs, hinn 27. október 2022, lagði borgarstjóri fram tillögu, dags. 10. október sama ár, sem efnislega felur í sér að borgarráð samþykki tillögu starfshóps um mótun stefnu og tillagna um aðkomu Reykjavíkurborgar að sjálfstætt starfandi leik- og grunnskólum (MSS22100084).

Þrátt fyrir að Samtök sjálfstæðra skóla (hér eftir skammstöfuð SSSK) hafi leitað eftir aðkomu við undirbúning og gerð skýrslu starfshóps um mótun stefnu um aðkomu Reykjavíkurborgar að sjálfstætt starfandi leik- og grunnskólum var ekki við því orðið. Fór svo að lokum að formaður SSSK og tveir starfsmenn SVP – Samtaka verslunar og þjónustu voru boðaðir á fund sviðstjóra skóla- og frístundasviðs og Birgis Björns Sigurjónssonar þar sem þeim voru kynnt helstu atriði skýrslunnar, sem þá var enn í drögum. Fór kynningin þannig fram að rennt var yfir skýrsludrögin á tölvuskjá á rúmri klukkustund. Óskaði formaður SSSK eftir að fá afrit af drögnum til umfjöllunar á vettvangi samtakanna en þeirri beiðni var hafnað. Tillaga borgarstjóra ásamt endanlegri skýrslu bárust svo SSSK með tölvupósti á framlagningardegi í borgarráði.

Í ljósi framangreinds komast SSSK ekki hjá því að harma hvernig staðið var að gerð skýrslunnar. Þrátt fyrir að beinlínis hafi verið gert ráð fyrir aðkomu fulltrúa sjálfstæðra leik- og grunnskóla að mótun draga að stefnu og tillögum um aðkomu og framlög Reykjavíkurborgar til slíkra skóla varð aðkoman engin. Bera efnistökin í skýrslunni það með sér.

Tillaga borgarstjóra, ásamt skýrslu starfshópsins, var send aðilum SSSK um leið og hún barst samtökunum. Boðað var til almenns félagsfundar um tillöguna sem var haldinn föstudaginn 4. nóvember 2022. Á fundinum lýstu fulltrúar allra sjálfstæðra leik- og grunnskóla sem til fundarins mættu miklum vonbrigðum með skýrslu starfshópsins. Sneru áhyggjur þeirra að þeim áhrifum sem tillögu skýrslunnar munu hafa á þá grundvallartilvistarforsendu skólanna að þeir njóti

sjálfstæðis. Það athugast að SSSK hafa margsinnis tekið undir áherslu á að eftirlit með faglegu starfi sjálfstæðra skóla verði eflt en slíkar áherslur eru hins vegar í skötulíki í skýrslunni.

Skýrslu starfshópsins fylgja drög að samningi Reykjavíkurborgar við sjálfstæða leikskóla og er gefið til kynna að efni draganna verði lagt til grundvallar í viðræðum borgarinnar við sjálfstæða grunnskóla. Fá SSSK ekki betur séð en að þar sé í grundvallaratriðum á ferðinni efni gildandi samninga sem hefur verið bætt upp í samræmi við ábendingar innri endurskoðunar Reykjavíkurborgar. Þær ábendingar voru jafnframt unnar án samráðs við SSSK og standast ekki skoðun í öllum atriðum.

Á framangreindum félagsfundi SSSK var lögð fram tillaga þess efnis að samtökin hafni því að ganga til samningaviðræðna við borgina á grundvelli tillögu borgarstjóra eins og hún birtist borgarráði hinn 27. október 2022. Sú tillaga var samþykkt samhljóða.

Í ljósi framangreinds er þess óskað, fyrir hönd SSSK, að borgarráð feli skóla- og frístundaráði að hefja að nýju viðræður við SSSK um samninga borgarinnar við sjálfstæða leik- og grunnskóla. Þó að í tillögum starfshópsins kunni að leynast atriði sem líta má til í viðræðunum er það afstaða SSSK að hefja þurfi viðræðurnar á að leggja nýjan grundvöll sem gerir bæði Reykjavíkurborg og skólum innan SSSK fært að varðveita, ekki aðeins tilvist þeirra innan marka borgarinnar heldur og þá ekki síst sjálfstæði þeirra í störfum.

Virðingarfyllt,

f.h. Samtaka sjálfstæðra skóla



Alma Guðmundsdóttir
formaður